

Vendim

Nr.903, datë 26.8.2009

PËR KRIJIMIN E AGJENCISË SË KËRKIMIT, TEKNOLOGJISË DHE INOVACIONIT (AKTI)

Në mbështetje të nenit 100 të Kushtetutës, të nenit 10 të ligjit nr.9000, datë 30.1.2003 “Për organizimin dhe funksionimin e Këshillit të Ministrave”, të neneve 5 e 45 të ligjit nr.9936, datë 26.6.2008 “Për menaxhimin e sistemit buxhetor në Republikën e Shqipërisë”, dhe të nenit 12 të ligjit nr.10025, datë 27.11.2008 “Për buxhetin e vitit 2009”, me propozimin e Kryeministrit, Këshilli i Ministrave

VENDOSI:

1. Krijimin e Agjencisë së Kërkimit, Teknologjisë dhe Inovacionit (AKTI), si një institucion juridik publik, në varësi të Këshillit të Ministrave. AKTI-ja e ka selinë në Tiranë dhe ka stemën e vet.
2. AKTI-ja ka mision mbështetjen, monitorimin dhe vlerësimin e programeve dhe të projekteve në fushën e shkencës, teknologjisë dhe inovacionit (SHTI), në shkallë vendi.
3. AKTI-ja, për të realizuar misionin e përcaktuar në pikën 2 të këtij vendimi, kryen detyrat e mëposhtme:
 - a) Bashkëpunon me ministritë dhe institucionet e tjera për zbatimin e strategjisë së SHTI-së dhe promovon kërkimin në fushën e shkencës, teknologjisë dhe inovacionit;
 - b) Realizon financimin e programeve dhe të projekteve të SHTI-së, në përputhje me përparësitë e përcaktuara nga Këshilli i Ministrave dhe me vlerësimin e bërë nga komisionet përkatëse;
 - c) Zhvillon procedurat e aplikimit, të vlerësimit fillestar, monitorimit dhe vlerësimit përfundimtar të programeve dhe projekteve të SHTI-së;
 - ç) Monitoron dhe vlerëson veprimtaritë e SHTI-së, në shkallë vendi;

d) Krijon dhe pasuron, në mënyrë të vazhdueshme, bazën e të dhënave, të analizës dhe dokumentacionit të sistemit të SHTI-së;

dh) Ofron asistencë teknike për të gjitha institucionet në fushën e investimeve në SHTI;

e) Promovon ngritjen e strukturave të SHTI-së në të gjitha nivelet;

ë) Promovon bashkëpunimin me sektorin privat në fushën e SHTI-së;

f) Promovon, ofron ekspertizë, bashkërendon dhe monitoron bashkëpunimin dy dhe shumëplanësh me BE-në, vendet e veçanta dhe organizatat e huaja, në fushën e SHTI-së;

g) Zbaton politikat e qeverisë për mbështetjen me përparësi të shkencëtarëve më të kualifikuar, të grupeve kërkimore dhe qendrave të ekselencës, në SHTI;

gj) Zbaton politikat e qeverisë për nxitjen e pjesëmarrjes së studentëve dhe të shkencëtarëve të rinj në veprimtarinë e SHTI-së;

h) Zbaton politikat nxitëse të qeverisë për kthimin e trurit dhe rritjen e angazhimit të diasporës intelektuale shqiptare në zhvillimin e arsimit, të shkencës, administratës publike dhe sektorit privat në vendin tonë;

i) Ofron mbështetje teknike për institucionet ekzekutive, legjislativin dhe institucionet e tjera, për përmirësimin e plotësimin e kuadrit të nevojshëm ligjor dhe nënligjor, në fushën e SHTI-së.

4. AKTI-ja është institucion buxhetor dhe financohet nga:

a) Buxheti i Shtetit, në formë granti, zëri “Fondi për shkencën, teknologjinë dhe inovacionin (FSHTI)”, në nënzërat e mëposhtëm:

i) Fondi për programet kombëtare të kërkimit dhe të zhvillimit;

ii) Fondi për infrastrukturën e kërkimit;

iii) Fondi për qendrat e ekselencës në kërkim;

iv) Fondi për transferimin e teknologjisë dhe inovacionin;

v) Fondi për kërkuesit e rinj;

vi) Fondi për programin Brain Gain.

b) Mjete financiare nga:

- i) palë të treta, të destinuara për SHTI-në;
- ii) nga programet dhe projektet e BE-së, të shteteve të veçanta dhe të organizatave partnere;
- iii) donacione të subjekteve fizike dhe juridike, të vendit dhe të huaja;
- iv) nga sektori privat, vendas dhe i huaj.

5. AKTI-ja e përdor buxhetin për fondin e pagave të punonjësve dhe për shpenzime të tjera, në funksion të përmbushjes së funksionimit dhe realizimit të detyrave të agjencisë.

6. Organet e drejtimit të AKTI-së janë:

- a) Bordi drejtues;
- b) Drejtori i përgjithshëm.

7. Bordi drejtues është organi kolegjal vendimmarrës i AKTI-së, që kryesohet nga Ministri i Arsimit dhe Shkencës.

7.1 Në përbërje të bordit drejtues, që miratohet me urdhër të Kryeministrit, janë:

- Zëvendësministri i Financave, që mbulon çështjet e buxhetit;
- Zëvendësministri i Ekonomisë, Tregtisë dhe Energjetikës, që mbulon çështjet e teknologjisë dhe të inovacionit;
- Zëvendësministri i Bujqësisë, Ushqimit dhe Mbrojtjes së Konsumatorit;
- Zëvendësministri i Shëndetësisë;
- Kryetari i Konferencës së Rektorëve;
- Sekretari shkencor i Akademisë së Shkencave;
- Një përfaqësues nga shkollat e larta private, me, së paku, gradën shkencore “Doktor”, i cili propozohet nga Konferenca e Rektorëve, për një periudhë 4-vjeçare;
- Kryetari i Unionit të Dhomave të Tregtisë dhe Industrisë.

7.2 Funkcionet kryesore të bordit drejtues janë:

- a) Propozon pranë Kryeministrit fondin e nevojshëm për shkencën, teknologjinë dhe inovacionin dhe për funksionimin e AKTI-së;

b) Miraton financimin e programeve dhe të projekteve të SHTI-së, në përputhje me:

i) FSHTI-në, parashikuar në ligjin e buxhetit;

ii) përparësitë e përcaktuara nga Këshilli i Ministrave;

iii) vlerësimin e komisioneve të vlerësimit të programeve dhe projekteve;

c) Autorizon drejtorin e përgjithshëm të AKTI-së për nënshkrimin e kontratave të zbatimit të programeve dhe projekteve të miratuara;

ç) Miraton raportin e veprimtarisë së AKTI-së, që i dërgohet Kryeministrit dhe bëhet publik;

d) Organizon konkursin për drejtorin e përgjithshëm të AKTI-së;

dh) Miraton përbërjen e komisioneve të vlerësimit të programeve dhe projekteve, sipas fushave të shkencës, në bazë të propozimit të drejtorit të përgjithshëm të AKTI-së;

e) Shqyrton dhe miraton raportet e monitorimit dhe të vlerësimit të programeve dhe projekteve, të financuara nga AKTI-ja.

7.3 Bordi funksionon sipas parimit të barazisë së anëtarëve.

7.4 Kryetari dhe anëtarët e bordit përfitojnë një shpërblim mujor, të barabartë me 15 përqind të pagës së sekretarit të përgjithshëm të ministrisë. Bordi mbledhet jo më pak se 6 herë në vit.

8. Drejtori i përgjithshëm i AKTI-së është titullari i institucionit dhe e përfaqëson atë në marrëdhënie me të tretë.

8.1 Drejtori i përgjithshëm i AKTI-së duhet të ketë gradën shkencore “Doktor”, të ketë kontribut të njohur në fushën e shkencës, të teknologjisë dhe inovacionit.

8.2 Drejtori i përgjithshëm i AKTI-së përzgjidhet nga bordi drejtues i agjencisë dhe emërohet nga Kryeministri, për një mandat prej 4 vjetësh, me të drejtë riemërimi. Ai mund të shkarkohet përpara përfundimit të mandatit, me propozimin e bordit drejtues ose me nismën e Kryeministrit.

8.3 Bordi drejtues i propozon Kryeministrit 3 kandidatë, të përzgjedhur me konkurs, i cili zhvillohet në përputhje me procedurat e parashikuara në ligjin për statusin e nëpunësit civil.

9. AKTI-ja, për çështjet e përmbajtjes dhe të vlerësimit të programeve e të projekteve, mbështetet me ekspertizë nga komisionet e vlerësimit të programeve e projekteve, që propozohen nga drejtori i Përgjithshëm dhe miratohen nga bordi drejtues, në përputhje me rregulloren e funksionimit të kësaj agjencie.

10. AKTI-ja ka, gjithsej, 15 punonjës. Struktura dhe organika e kësaj agjencie miratohet brenda një muaji nga hyrja në fuqi e këtij vendimi, me urdhër të Kryeministrit.

11. Funksionimi i AKTI-së rregullohet në përputhje me rregulloren e funksionimit të kësaj agjencie, e cila përgatitet nga drejtori i përgjithshëm, në bashkëpunim me bordin drejtues, dhe miratohet me urdhër të Kryeministrit.

12. Procedurat e emërimit të personelit janë në përputhje me ligjin për statusin e nëpunësit civil, dhe aktet nënligjore e në bazë të kriterëve të përcaktuara në këtë vendim. Pagat e personelit përcaktohen me vendim të Këshillit të Ministrave.

13. Kryeministria të sigurojë mjediset e punës për vendosjen e AKTI-së.

14. Anëtarët e bordit dhe drejtori i AKTI-së emërohen brenda dy muajve nga hyrja në fuqi e këtij vendimi.

15. Për vitin 2009, AKTI-ja financohet nga buxheti i miratuar për Kryeministrinë.

16. Kryeministrisë, në buxhetin e miratuar për vitin 2009, zëri “Investime”, t’i shtohen 10 000 000 (dhjetë milionë) lekë, për rikonstruksionin dhe pajisjen e mjediseve të punës dhe 5 000 000 (pesë milionë) lekë, për fondin e pagave dhe shpenzimet e tjera, të nevojshme për veprimtarinë e AKTI-së, për këtë vit.

17. Fondet e përmendura, në pikën 16 të këtij vendimi, të përballohen nga fondi rezervë i Buxhetit të Shtetit.

18. Administrimi i programeve, i projekteve të kërkimit e të zhvillimit dhe i programeve të tjera, të cilat përfshihen në veprimtarinë e AKTI-së, por, që aktualisht realizohen nga institucionet e tjera, t’i transferohet plotësisht kësaj agjencie, në 1 janar 2010.

19. Ngarkohen Kryeministria dhe Ministria e Financave për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha